



# HOGHOL

**Dooqaadky Af Soomaaligy - Maayky - HOGHOL Soomaali Maay Newsletter**  
| **Bil'ly - Monthly** |

## Walaa Tirooduung ki jero

- Taariikdy Jamaa'atha Baardheere (1-2)
- Wal barashoody Reer Arlaadi Gumeysighy ku Hor (2-3)
- Magmaag (4)
- Dhaghanky (4)
- Manaahijta walbarashoody Dowladda Federaalky (5)
- Wargiling (5)
- Ogaahing i mahadnag (5)

Tifaftiry: Abdullahi Sheikh Mahamad

## Aasaasy - Founder

Goobty Horumariyoky Afky Maayka (Afmaay Development Center), maay la aasaasy sanadky 2017. Sababty liing aasaasy maaybuwaaha horumariyowky afky ii dhaganky Maayky (Af-Soomaaligy Maayky).

Maay ha dhawaayaanee dhammang dadky ky howlling horumariyowky afky-aayow, Af-Maay.

**Abdulkadir Abukar Sheikh, Founder Af Maay Development Center (ADC)**

Email:

[afmaaydevelopmentcenter@gmail.com](mailto:afmaaydevelopmentcenter@gmail.com)

Facebook: <https://www.facebook.com/afmaaydevelopment/>

**Office: Baidoa, Sheekh , S/Land, Muqdishu i i Örebro, Sweden.**

## Taariikdy Jamaa'athy Baardheere: Qeebtii 10aad Baardheere Historia=Baardheere History



Dr Omar A. Sh. Abdurahman Sweden

Sheq Abdiraman Sh. Mad Edin (2 Sini 1878 -1879) Qeebti 9aad weyba hangk hadalneeey taarikdii Aw Sheq mad Edein Kerow. Reed ing dhisky jameeada Baardheere. Wey kaloo haky hadalneeey arrintii sahamiyayaalkii ing kooyeng ing iyo aruuriyaang haalky arlaady i dadshee si liingky diyaariyio ing la adoonsido. Dilkii Decken i widaaysheey wey abuurtey obsi Talyaanigy ing Baardhere kooyang.

Sheq Mad Edeng Kerow marki usu hajké ku kooyi wey Daafeet kily kulumeey Aw Sheq Abdiyow Usmanow oo eed ingky shekeysideeng barnaamijky liky hormariyaaw Jamee'ada oo eed iniisly fahameeng. Dhimishidiis ku hor wey ky derdaarimeey (ama ishaareey) ing Ulul-Amrigy



Jameeada Baardheere nagady Aw Sheeq Abdiyoow Usmanoow oo markaas deqenaayi Buulooy Bagdaad deegaangy Daafeet. Marky maadaama usu ing rooghne, wey si ky meel deer eh walaayada Ulul Amrinimidy jameecada Baardhere liingké weeley arriky Aw Sheq Mad Edeing Kerow - Sheq Abdiramaan Shek Mad. Nassib dorry Sheeq Abdiramaan mudidi usu maamulky haayi eedaa ing yaraayti, muddo lammy sini ingky badinayni markaas oo tii Rabbi ing kooyti oo ly oofsidi.

Nasiib dorry isly waqtiguung weybaa billawiteey kooyowkii gumeestiyaalky reer Yurub oo Somalia meely badang haku gali, siiby deegaamee heebo i dekedoo leh. Gumesstiyaalky kooyowshoo weyba abuurteey qas miisaankii iyo degenaantii arlaady usugoo adeegsidaaw heelady "qeebi oo hukung". Weyba eed iniisky deyeey ing usu tirtiro raad taariikeedky dadky i dalka Soomaaliya lahaayeeng iyo meeloo magaagy i taarikdy lahaayi.

Ilaaheey ing nahariisaa Sheq Abdiraman maddii dhimidi wey liky duugeey qabuuroo Ulul-Amriyaalky. Ku reed wey ly weeydiyeey Aw Sheeq Abdiyow Usmanow oo deqnaayi Daafeet oo Aw Sheq Mad Edeing Kerow dhimishidiis ku hor ky dardaarmi (ama ishaari) ing Ulul-Amriy Jamee'ada Baardheere nagady.

Ly dareer qeebty 11aad

### **Wal barashoody Reer Arlaadi Gumeesighy ku Hor**

Mohamed Haji Mukhtar (Dr.)  
Savannah State University  
Savannah, Georgia, USA

Wal barashoody way buwahi furaagy nololly. Lamby langkii ku 'ilmy badanyi ye ku maal badanyi, ku aqly badanyi, ku fiyaawaang badanyi. Reegay way lahaku deereey; Kibridy (*experience*) qof leyi, seddy namuungu: mady ku irrooly, lug ku irrooly i hebed ku irrooly. Mady ku irrooly way buwahi lang/qof dog eh, kibridiis, way ky egtaa intii usy ifky ky noolaayi. Lug ku irrooly way buwahi lang/qof dereer badyng, kibridiis ku wiinty tang mady ku irrooligy, dereershey badyng way hang siyaadiyeey walyaaby usub liingky gorodaany degaansheey i dalsheey; "adunyi way buwaahi: sheeky i shaahid". Hebed ku irrooly way buwahi lang wal baradi, ilmy leh; hattaa usy o yeryi meelny iniing banne, degaanshey i dalsheyley roogy ye wal baradi, saas dartiye kibrydiis way sal ky letta ta'liing i diraasy (ilmi baaris) suubiyow.

Arlaadi sidy Islaanky hang deeri, wal barashoodiyee way sal ky lahaayteey Af Arabi. Barashoody i hifdiyoowky Quraanky kariimky eh ye aasaas ing haayi ta'liinty Arlaadi. Unuggy maddii quraanky dhammaayo, qeertis ly dhowy (li dhiibo), way kor ku haaye 114ti suurydood; way ing dheeraa, way akriyi koree, abtugy koree Af Arabi oo afki aadiis ing haayne. Af ajnabi barashoodiis way ing baahynta seddy sheey: qorow, akriyow, i fehewow (kasoow ma'anaagy). Markii, unuggi quraangky dhammaayi way leey ing dhimminaa fehewowky afkung ajnabi usy qory kory waany akriyi kory. Si taas liing deero, wal hirooyi jerii si ilmy lahang siyaadsydy. Suubineegy Aleyhi as-Salaatu wa as-Salaam (ASWS) way

muslimiinty ky dhiiriyeey; Ilmy ing weydiisidaang ilaa Arly Shiiniby haadoo: “Utlubuu al-Ilma wallow fi as-Siin”. Somali gudaashe way ky yaalaany herymy (haruumy) ky magi dheer barashidy tafsiirka Quraanky, hadiisky, ahkaanty, nahwigy i ta’liinty islaamigy. Herymeedung way ku mid ehaa haano ky yaalang heebo Banadir, masalang: Muqdishu, Marka, i Barawa; haano ky yaalang dalky gudaashey, masalang: Baardheery, Sarmaang i Baydhowy; haanony irydhiing jeraang sidy: Qulunquul, Harar i Jigjiga. Maddaas ku ba’di haddi langky ing baahydy ta’liing intung ku siyaady eh way liing hirooyi jerey Hijaas, masaln: Makky ii Madiiny; Shaam sidy: Dimashq; Iraaq, sidy: Baghdaad, haddi kely Waaqo Afrika, sidy: Qahiry ii Qeyrawaan.

Hirtuung maddii ha dhamaasydaang ta’liintiyoo way haky nagadaayana arlaadi yo haku hirooyeng. Markaasaa hooggy saarayaang sidy yo ing fidiyi lahaayeng diinty Islaangky oo salshee eyi Af Arabi. Maadaama dadsho Af Arabi ing gorodaany, way suubiyeena manhaj (curriculum), ta’liimeed munaasib ing eh duruufiyo. Taasooy way ly mid etaa manaahijta geeky liing gorodaaw baryshooda Af lammaad, amy barashoody af qalaq, sidy (*Ta’liim al-‘Arabiyyah ligheyri an-Naatiqiina biha*). Manhajkung usub way sehel ky dhikeeyi barashoody Quraanky. Manhajkung way Af Maay ku dhikeey shagalleedii Arabigy haayii harfoo kor ii hoss ku saarinaayi, masalan, *fathah*, kordhow; *kasrah*, hoos dhow, *dhammah*, godyng; “Elif ly kordhowey, elif ly hoosdhowey elif ly godi”. Tang way eta guul ilmi (ogoong) oo sheeneeng ulmaadi Reer Arlaadi quruung hory, way noo mudunjiina ammaang i mahad Siyaady eh i do’aa.

Ulmaadeeng way kely dijhiyeeny manhaj lammaad liky baradaaw uluunty ly hariirty Af Arabigy, tafsiirky Quraanky, hadiisky Subyneegy ASWS, ahkaanty (*fiqhigy*), i guud hang barashydy uluunty Islaamky (*ad-diraasat al-Islamiyyah*). Manhajkung way lyng gorodeey “*Laqby*” ma’naashee eyi magy lammaad ing biyow, amy koofaar ing weelow (ma’anaayoow). Way buwahyi hab ky saabsyng afaf liisky tarjumaw, Af Arabi liing tarjumaw Af Maay, amy Af Maay liing tarjumaw Af Arabi. Manhajkung door wiing ye ku qaadydi ta’liinty diinigy Reer Arlaadi goony hang, Somliya guud haang. Langky manhajkung wal ky barady way nagadeeyi lammy afly (*bilingual*) amy af badany (*multilingual*). Habkung usuuny way fududaayey barashidy uluunty diinigy eh, wayny eyaa hab ad-duungky dhong liky edeegsidaaw, maddii ly fadaaw ini luku faa’ideeysidy kibridi, hadaarydy (civilizations), i quruung kely (other nations). Mar lammaad, tangny way buwaa guul oo sheeneeng ulmaadeeng, waana mudung ing liky faany.

Geesky Afrika way diinty Islaanky ki fidiyeey ulmy Reer Arlaady eh. Herymeediyo ye haayeng herymeedy lahang hirooyi jeri; lahang ku hirooyi jeri bang Arab, Itoobiya i umudoo degaayaang Geeska Afrika dhammaantiis. Intii gumessigy ing kooiny arlaady way ky tahanaayeeny jamaa’ooying diing lyky barydaayi; hooly mood i noolby leh lyky dhagaayi, is maamul siyaasy, salaatiing, malaagy i akyaarny ing dheerayeeng.

### Magmaag (Ordspråk): Beeng lugtooleey/Lutooleey letty:

**Diyaaring:** Omar Abdulqadir Sheikh Abdurahman

**Fasiraad:** Abdullahi Sheikh Mohamed

Magmaagtuung maaybaa sheeghasee ing beeng hoo wal lug leh dareeraaw liki meselo hal lug leey lety maay weeli hoo wal suurto galaaw ing haayne maddiibaa la arree dooghaas wal suurto galaaw me e' waana wal diitheer reed ma dadareeraaso dadkina miki dha faafaaso. Tang kale dadka beengta liki sheeghi ama luku sheeghi si deg deg e' yee ki kashifaayaang ini walaa li sheeghi been eyiing oo rung ing haayne yeena meellaa ki her-aase maana ki dha faafaaso dadka. Sithaas dartiyee yee liing arri "beeng lugtoo leey lety hoo luku qobotho kufaase".

### Dhaghang (Kultur): Hungirighy Aralaathy






Lammy noo' soor eh hattiny shal kusaar eh  
Diiwaangky AMDC

Masawarkuung maay ku muuqithee:

**Bithy:** Soor galleey sahang liki baari/beer, so'/hibil ii suugy liky kusaari dhiniyaal ku yaalaang raasoow karsyng baaquly ky jero ii quthaar kaly liiminy kor saaringty.

**Mithig:** Soor misghy hoo-ry liki baari/beer wang liky kusaari hangqrafny saaring, koobky wangty i quthaar karsingny baal yaalaang.


 Goobty Horumariyowky Afky Maayky  
 Dooqaadky Af-Maayky


**Hogol**


Af-Maay Newsletter  
 Af-Maay Development Center (ADC)  
 Email: [afmaaydevelopmentcenter@gmail.com](mailto:afmaaydevelopmentcenter@gmail.com)  
 Office: Baidoa, Sheekh, S/Land, Muqdishu i Örebro, Sweden


 Goobty Horumariyowky Afky Maayky  
 Dooqaadky Af-Maayky


**Hogol**


Af-Maay Newsletter  
 Af-Maay Development Center (ADC)  
 Email: [afmaaydevelopmentcenter@gmail.com](mailto:afmaaydevelopmentcenter@gmail.com)  
 Office: Baidoa, Sheekh, S/Land, Muqdishu i Örebro, Sweden

**Wargiling:**

Dooqaadky Hoghol maaybaa ha dhawaayee walaaghii taly ii fikirid ky saabsing hurmariyoky Afky-Maayky: Haniikily hariir: Qofkii haayo, qoraaly, taariikdy, suugaanty Afky-Maayky, haniingky dir:

**Eamil. [afmaaydevelopmententer@gmail.com](mailto:afmaaydevelopmententer@gmail.com)**

**Goobty Horumriyowky Afky- Maayky - Afmaay Development Center (ADC)**

**c/o Sydvästsomaliska Riksförbundet I Sverige**

**Föreningarnas Hus**

**Slottsgatan 13A, 70361Örebro, Sverige**

**Tel. 019-133110**

**E-mail: [sydvast.somaliska@outlook.com](mailto:sydvast.somaliska@outlook.com)**

**Manhaj Jangjeero**

**Manaahijta Walbarashootha Dowladda Federaalky mi dheelitiring.**

**1- Buugaagty Mahaa tirileey ky qoronyiing**

**2- Gopolee koofureed afshoo, taariigdiyoo iyo Dhaghanshoo ku moqonyiing buugty taariikdy iyoonaay haang af Soomaalighy addaala dorruwaa hal sahooy**

**AMDC****Ogaahing:**

Hogholeedii kang hu horeeyi maddi wal qorodky maqaaly ha niing diraang may ki saha jerneey qaabkii farty Maayky 1994tii. Lahaku billaawo 1994tii ilaa hatty, bulshidy ky dowahaaso Af Soomaaligy Maayky wili si fayle miing qobone fartii laha jeediyi. Intii Hogol billaawni lammy sini I nusaa luku rooge, dadky maqaal ha niing diraaw eedaa ing yaryiing, haatoo dad badang iyee may leyiinaa farty hay fududaayooy sidy hatty ety dhib badanty may lily qobsodo koro. Maduung Bahdy Hoghol may go'aangsiteey inii agoonyhangky ha diraayaang maqaalee sidy iyo haky diraang haky saaraano maddii luku reebo wal yar sahoow eh oo luku maarimu waayo maayi. Ili jeediny may etaa bal inii aragno sida dadky jeelyiing omboo ing badanyiing inii ing abtugaang farty Maayky, iyo haddii is beddelkuung saba-baaw ha jiidishy akrisidiyaal badang. Maay rajeeyaanee inii akriisiyaalky haniing diraang maqaaly ki saabsing taariigdi, afky I dhagangky reegaayteeng.

**Mahad nag:**

Bahdy Hoghol may eed i eed ingy mahadiyaane Bare sare/ Barfasoor Mohamed Haaji Muktaar oo haniing diri maqaal eed ing qiimy badang maynaa rajeeyaane inii jeelaadi doontaang hoo Alle erra.